

La rei anter mendranzes passa per la musega

Na delegazion de la Vallée d'Aoste é stata chisc dis passé a Trent e te Fascia, per veder de strenjer n leam anter sia comunanza e la mendranzes de nosc raion

Vich - Stravardèr e valorisèr la cultura de la comunanzes de lengaz mender, ma vardan inant con eie ascort al mond de anchecondi, per no sutèr ite te la tentazion de se serèr tel folclorism. Chest l'obietif palesà chisc dis passé da la delegazion ruèda tel Trentin e te Fascia per cognoscer e strenjer leames con l'autra mendranzes. L'assessor a l'istruzion e cultura de la Region Vallée d'Aoste Laurent Vierin, compagnà dal sorastant ai bens e ativitàes culturèles Roberto Domaine e dai diretores di servijes per la promoziun e la valorisazion di bens e de l'ativitàes culturèles Carla Fiou e Gaetano de Gattis se à scontrà dant a Trent, con l'assessor provinzièl a la cultura Franco Panizza, e te chela ocasion l'é stat prejentà en particulèr l'projet "Canti della Terra", che la Region Vallée d'Aoste à envià via per valorisèr la musega populèra te anter i joegn. La scontrèda à abù n ghest de eceziun, l'componist Mogol (Giulio Rapetti a l'anagrafe) autor de la cianties più beles de

Lucio Battisti, che da egn porta inant na fona colaborazion con la Region autonoma Vallée d'Aoste, olache l'à metù sù ence na scola de musega de gran prestije.

La delegazion valdostèna é ruèda la di dò te Fascia, ensema con l' dirigent del Servije Mendranzes de la Provinzia de Trent Marco Viola e sia colaboradora Paola Gualtieri, e tel Museo Ladin l'à podù se confrontèr con l' diretor Fabio Chiocchetti per veder de portèr inant projec de valorisazion che lee la mendranza ladina con chela de la Vallée d'Aoste.

L'assessor Laurent Vierin e si colaboradores à podù vijitèr la sales espositives del Museo fascian, palesan marevea e aprijiamet per la empostazion deldut moderna e razionèla più che "folclorica", aldò di prinzipies che i aea palesà apontin pech dant te la scontrèda.

Apede ai obietives che revèrda più avisa l'confront anter i musees, la prospetives de na colaborazion percanta é jites ite più avisa tel



La delegazion de la Region Vallée d'Aoste con i funzionaries del Servije Mendranzes de la Prvinzia de Trent e l' diretor de l'Istitut Cultural de Fascia tel Museo Ladin.

setor de la musega. Da man de l'assessor regionèl valdostan l'é stat recordà la scomenzadiva peèda via chest uton del "Festival des peuples minoritaires" a Aosta, a chel che à tout pèrt anter l'auter i gropes Oskorri (Paesi Baschi), Canta u populu Corsu (Corsica) e

Massilia sound system (Occitània). Na manifestazion che se lea perfetamente a scomenzadives desche "Ciantà Vilotis", l'conzert, con CD e DVD, endrezà da l'Istitut Ladin per valorisèr e atualisèr la museghes tradizionèles per poder les portèr ence te anter i joegn, o

a "Encresciadum", nasciù per declinèr l' lengaz de mendranza ti stii musicai più neves e joegn desche l' jazz.

Pean vbia da chesta esperienzes, la colaborazion anter ladins e valdostegn podarà donca jir inant travers la musega. (lg)